

2012-mut aningaasanut inatsisissatut siunnersuut

(Aningaasaqarnermut Naalakkersuisoq)

Akissuteqaat

(Aningaasaqarnermut Naalakkersuisoq)

Aappassaaneerinninneq**Aallaqqaasiut**

Aallarniutigalugu 2012-imut aningaasanut inatsisissatut siunnersuummik aamma maani aappassaaneerinnermut Naalakkersuisut allannguutissatut siunnersuutaannik sukumiisumik suliarinninneranut Aningaasaqarnermut Ataatsimiititaliaq qujaffiginiarpara.

Missingersuutitut ilanngussanut allannguutissanik siunnersuutitut katillugit 160-inik aamma aappassaaneerinninnermut oqaasertaliussanut allannguutissanik siunnersuutitut 25-inik Naalakkersuisut saqqummiussaqaqput.

Politikkikkut isumaqatigiinniarnert

Ukioq manna 2012-imut aningaasanut inatsimmut partiit tamarmik kissaataat naatsorsuutigisaallu pillugit isumaqatiginninniartoqarsimavoq.

Isumaqatiginninniarnert pissarsiffiulluarsimapput iluaqutaasimallutillu, partiillu tamarmik aningaasanut inatsimmut attanneqarsinnaasutut aningaasarsiornikkullu illersorneqarsinnaasutut tamarmik immikkut isigisaminnik siunnersuuteqarnermikkut ilanngussaqaqarsimallutik. Ajunngitsunik pissarsiffiulluurtunillu ilanngussaqaqarnerannut partiit tamarmik sinniisui qujassuteqarfigaakka.

Partiit siunnersuutaannut tusarnaarsimavunga tamannalu ajornarsimanngikkaangat sapinngisamik naapeqatigiiffissaqartarluta. Tulliuttumi ukiup tullianut aningaasanut inatsisissaq pillugu naalakkersuinikkut ingerlatsinermit isumaqatigiinniarnert aallaavigalugit kissaatigisat assigiinngitsut naatsorsuutigisallu akuersaarnissaannut Naalakkersuisut siunnersuutaat nassuiaateqarfigissavara.

Assigiinngitsuniit kissaatit akuerineqarneri

Sinerissami sanaartornerit naalakkersuinikkut ingerlatsinermit isumaqatigiinniarnert annertuumik sammineqaqput.

Sinerissami sanaartornermut aningaasanik amerlanerusunik immikkoortitsisoqarnissaa pillugu partiit tamarmik kissaateqarsimapput. Kissaatitut taakkununga Naalakkersuisut tusaaniarsimapput.

Aatsaat siullerpaamik 2012-imi 22 mio. kr.-inik A/S INI-miit immikkut ittumik iluanaarutiniq pissar-sisoqarnissaa naatsorsuutigineqarpoq. Naalakkersuisunit siunnersuutigineqarpoq INI-miit iluanaarutis-satut naatsorsuutigisat taakku Nuup avataani sinerissami iluarsaassinernut immikkut atugassanngortin-neqassasut. Taamaalilluni naatsorsuutigineqarpoq inissiat attartortinneqartartut aaqqissuussaasumik ilu-arsanneqarnerat aallartinneqarsinnaassasoq, misiligummillu suliniutit Nanortalimmi, Qaqortumi, Aasi-anni aamma Tasiilami ingerlanneqassasut naatsorsuutigineqarluni.

Taakku saniatigut Naalakkersuisunit siunnersuutigineqarpoq Nuummi Tuapannguani napasuliarsuarni sulisunut inissiat tuniniarneqarnissaat neqeroortugineqassasoq ukiuni 2012-2014-imi ukiuni ataasiak-kaani tamani napasuliarsuaq ataaseq tuniniarneqartarluni. Napasuliap ataatsip nunatta karsianut 15 mio. kr.-inik isertitsissutigineqarnissaa naatsorsuutigineqarpoq. Isertitat siunertamut tassunga immikkut atu-gassanngortinneqassasut siunnersuutigineqarpoq, tassa Nuup avataani sinerissami aaqqissuussaasumik iluarsaassinernut.

Taamaalilluni Naalakkersuisut ataatsimut siunnersuutigaat Nuup avataani sinerissami iluarsaassinernut aningaasaliissutit 2012-imi 37 mio. kr.-inik aamma 2013-imi 2014-milu ukiuni ataasiakkaani 15 mio. kr.-inik qaffaaneqassasut.

Kujataani Neqi A/S-ip savaaqqanik toqoraavia pisoqalisoq pillugu siunissamut ungasinnerusumut aaqqiissoqarnissaa partiininngaannit kissaatigineqarsimavoq. Naalakkersuisut siunnersuutigaat 2012-imi 5 mio. kr.-it ukiuni 2013-imi aamma 2014-imi ukiuni ataasiakkaani 7 mio. kr.-it immikkoortin-neqassasut. Aningaasat toqoraavimmik Neqi A/S-imik kiffartuussinissamut isumaqatigiissuteqarnermut atorineqassapput. Tassunga atatillugu ullutsinnut naleqquttumik toqoraavimmik nutaamik nutaaliaasu-mik pilersitsisoqarnissaanut Neqi A/S suliniuteqassaaq, siunissami aamma savaaqqanik toqoraanermik allaanerusunik allanik suliaqarsinnaasoq.

Naalakkersuisut naliliipput tapersersorneqarsinnaasumik pitsaasumik ullutsinnullu naleqquttumik aaqqiissuteqarnissamut aallarniisoqartoq.

Aalisarneq pillugu inatsit aamma malunnartumik sammineqarpoq. Aalisarneq pillugu inatsimmut tunngatillugu kissaatit Naalakkersuisunit eqqarsaatigineqarsimapput, siunnersuutigalugulu aalisarneq pillugu inatsimmi nutarterinermut tapersersuisumik sinerissamut qanittumi misileraalluni aalisarnermut aningaasanik immikkut immikkoortitsisoqassasoq. Peqatigisaanik aningaasaliissutit immikkoortinneqartut ilaasa biologit aalisartullu akornanni suleqatigiinnerup pitsaanerulernissaanut atorineqassasut siunniunneqarpoq. Tassunga Naalakkersuisut siunnersuutigaat ukiuni 2012-2015-imi ukiuni tamani 2,5 mio. kr.-it siunertamut immikkoortinneqassasut.

2012-imut aningaasanut inatsisissatut siunnersuusiorderup naammassinissaa sioqqutilaarlugu Great Greenland A/S Naalackersuisunut nalunaarpoq ingerlatseqatigiiffik aningaasaatitigut aningaasaliiffigineqarnissaminik pisariaqartitsiunnaartoq. Ukialli tungaanut 12 mio. kr.-inik aningaasaatitigut aningaasaliiffigineqarnissamik nutaamik Great Greenlandip siulersuisui Naalackersuisunut kissaateqarput. Kissaatigisaq Naalackersuisunit eqqarsaatigilluarneqarpoq siunnersuutigalugulu 2012-imi 8 mio. kr.-it immikkoortinneqassasut, ukiunili missingersuusiorderfiusuni ingerlatseqatigiiffimmut aningaasaliissutinik immikkoortitsisoqassanngitsoq. Aningaasaliissutissanik immikkoortitsinerup peqatigisaanik piumasarineqarpoq ingerlatseqatigiiffiup ingerlatsinerata ingerlaannarnissaanut siunissamut ungasissumut 2012-imi qaammatit siulliit pingasut naanerini iliuusiliortoqassasoq.

Great Greenlandip ajornartorsiutaasa niuerfinni pissutsinik aalajangersimasunik tunngaveqarnerannut Aningaasaqarnermut Ataatsimiititaliap isumaqarnera Naalackersuisut isumaqatigaa, ingerlatseqatigiiffiulli siunissaa annertoorejussuarmik Naalackersuisunit aarleqqutigineqartuarpoq. Ingerlatseqatigiiffik ukiorpaalunni atugarliortuarsimasoq, ingerlatseqatigiiffiup piviusorsioortumik naliliiffigeqqinnissaa aamma siunissami ungasinnerusumi puisit amiinik tunisisarnerup siunissaa siunertaralugu misissorluaqqissaarneqartariaqarluni.

Aappassaaneerinninnermut allannguutissatut siunnersuutit pingaarnerit

Naalackersuisut siunnersuutigaat GU-mik nutarterineq akuersaarniarlugu missingersuutinut sunnuteqanngitsumik allanut nuussisoqassasoq. 2012-imi siunnersuutigineqarpoq konto pingaarneq 20.11.61, Ilinniartitaanermut sillimmatinit kiisalu konto pingaarneq 40.01.08, Ilinniartitaanermut immikkoortumi suliniutinik aningaasat nassaarineqassasut. 2012-imi katillugit 9,5 mio. kr.-it.

2013-imiit 2015 tikillugu siunnersuutigineqarpoq ukiumut 19,5 mio. kr.-inik missingersuutitigut iluarsiinernik naleqqussaasoqassasoq, GU-mik nutarterinerup aningaasalersornissaanut. Tassani siunertaq tassaavoq 2012-ip ingerlanerani Naalackersuisunit naatsorsuutigineqarpoq ilinniartitaanerit annikitsut misissorneqassasut, ingerlatsillualernissaq siunertaralugu. Ingerlatsillualernerit taakku naatsorsuutigineqarpoq 2013-imiit siumut GU-mi nutarterinerup tamarmiusup naammassineqarnissaanut aningaasaliissutaasinnaassasut.

Kommune Kujalleq nunatta karsianiit immikkut taarsigassarsiniarluni qinnuteqarsimavoq, tamannalu akuerineqassasoq Naalackersuisunit siunnersuutigineqarluni. Tamanna ISA-nut 2012-imi 26,4 mio. kr.-inik aamma 2013-imi 10,8 mio. kr.-inik ajortumik sunnuteqassaaq, aatsaallu 2014-imi aamma 2015-imi utertillugit akilerneqarnissaat naatsorsuutigineqarluni.

Naalakkersuisut siunnersuutigaat ukiuni 2012-2015-imi atuartut nerisaqartittarnerannut kontop ammaqinnissaanut 3,8 mio. kr.-it immikkoortinneqassasut. Taamatut siunnersuuteqarnikkut Naalakkersuisut naatsorsuutigaat Namminersorlutik Oqartussat kommunillu isumaqatigiissutigisinnaasaannik 2012-ip ingerlanerani atuartut nerisaqartinnerannut tunngasunik aaqqiissummik attanneqarsinnaasumik nassaartoqarsinnaasoq. Atuartut nerisaqartinnerannut konto 2011-p ingerlanerani kontomi pingaarnermi atuinerup qaffasiffigisaanut pilerseqqinneqassaaq.

Allannguutissatut siunnersuutit tamaasa maani saqqummiunniangilakka, naggasiulluguli 2012-imut AIS-ip aappassaaneerneqarnissaanut Aningaasaqarnermut Ataatsimiititaliap isumaliutissiissutaanut ajunngilluinnartumut innersuussissallunga.

Aningaasaqarnermi aaqqissugaanermi siunissami ungasinnerusumi oqimaaqatigiinnginneq

Aningaasanut inatsimmi oqimaaqatigiissitsinissaq imaluunniit sinneqartoornissaq ukiuni aggersuni ilungersornartuusussaavoq. Aningaasatigut ingerlatsineq attanneqarsinnaanngilaq, ukiualuillu qaangiuppata uttoqqaat amerlassusaasigut annertuumik qaffariartoqarnissaanut aningaasaqarnikkut ingerlatsinerput maannakkut naleqqussartariaqarlugu.

Akilerartarnermut Atugarissaarnermullu Ataatsimiititaliarsuup aamma Aningaasaqarnikkut Siunnersuisoqatigiit Namminersorlutik Oqartussani kommuninilu ingerlatsinermi aningaasartuutini ukiunut arlalinnut qummut killiliisoqarnissaa kaammattuutigaat. Tamatumunnga 2013-imut aningaasanut inatsisissap piareersarnerani Naalakkersuisut siunnersuuteqassapput. Taakku saniatigut pingaaruteqarpoq aningaasartuutini ataavartumik ikilisaataasinnaasunik aamma innuttaasutta ilai amerlanerusut aningaasaqarnikkut imminnut napatinnissaanut taamaalillutillu ajunngitsumik akilerartartunngornissaannut aaqqissuusaanikkut nutarterinernik ukiuni aggersuni Inatsisartut ingerlatsisariaqarput.

Ullut pingasut qaangiuppata Akilerartarnermut Atugarissaarnermullu Ataatsimiititaliarsuup isumaliutissiissutaata malitseqartinneqarnera pillugu nassuiaat Inatsisartuni oqallisigineqassaaq. Inuiaqatigiit atugarissaartut ingerlatiinnarnissaannut aningaasaqarnikkut attanneqarsinnaasumik ineriartortitsisumik nutarterinissamut pilersaarut Naalakkersuisut saqqummiutissavaat.

Erseqqissaatigissavarali suliassaq tassaassanngimmat aningaasartuutissanik nutaanik pilersitsinissaq, kisianni atugarissaarnerup aningaasalersornissaanut tunngavissanik pilersitsinissaq. Maanna killiffik oqaatigineqareesutut periarfissaanngilaq.

Soorlu Aningaasaqarnermut Ataatsimiititaliap isumaliutissiissummini eqqortumik oqaatigigaa ukiuni missingersuusiorfiusuni tamani amigaartoorutit amerligaluttuinnartut iliuuseqarfigneqarnissaa

pisariaqarpoq.

ISA-mi aamma IS-imi oqimaatigiissitsineq

2012-imut AIS-p aappassaaneerneqarneranut Naalakkersuisut allannguutissatut siunnersuutaat ukiuni tamani ISA-mi amigartoortitsivoq.

Piffissami 2012-2015-imi nunatta karsiata ISA-mi amigartoortitaat 2012-imi 249,5 mio. kr.-iuvoq, 2013-imi 266,5 mio. kr.-iulluni, 2014-imi 37,4 mio. kr.-iulluni kiisalu ukiuni missingersuusiorfiusuni kingullermi 2015-imi 76,4 mio. kr.-iulluni.

Taarsigassarsiinerit ilaatinggikkaanni, taava IS-imi amigartoortit Naalakkersuisut allannguutissatut siunnersuutaat naapertorlugu 2012-imi 28,1 mio. kr.-iupput, 2013-imi 112,4 mio. kr.-iullutik kiisalu 2014-imi aamma 2015-imi 68,5 aamma 127,1 mio. kr.-iullutik.

Naggasiullugu oqaatigissavara nunatta karsiata IS-imi angusaasa oqimaaqatigiissinnerannik kinguneqartussamik pingajussaaneerinninnermut Naalakkersuisut allannguutissanik siunnersuuteqalersaarmata.

2012-imut AIS-p aappassaaneerneqarneranut Aningaasaqarnermut Ataatsimiititaliap isumaliutissiissutaanut oqaaseqaatit

Aningaasaqarnermut Ataatsimiititaliap isumaliutissiissutaanut Naalakkersuisut qujarusupput Aningaasaqarnermullu Ataatsimiititaliap innersuussutai tusaatissatut tigullugit.

Aningaasaqarnermut Ataatsimiititaliap isumaliutissiissummini arlalinnik apeqquteqarpoq. Taakku Naalakkersuisut allakkatigut akissuteqarfigissavaat.

Taakku saniatigut Aningaasaqarnermut Ataatsimiititaliap aappassaaneerinninnermut isumaliutissiissummini ajornartorsiutinut marlussunnut Naalakkersuisut isummersoqquai.

Aappassaaneerinninnissamut allannguutissatut siunnersuummi taamaallaat 2012-imi INI A/S-imiit 22 mio. kr.-inik immikkut ittumik iluanaarutit akilerneqassasut ilanngunneqarpoq. Suliaq pillugu erseqqinnerusumik nassuiaasoqarnissaa Aningaasaqarnermut Ataatsimiititaliamit kissaatigineqarsimavoq. Iluanaarutininik akiliuteqarnissaq siunertaralugu ingerlatseqatigiiffiup aningaasaqarnikkut inissisimanerannik nalileeqqullugu siulersuisut Naalakkersuisunit qinnuigineqarsimapput. Siulersuisunit nalunaarutigineqarpoq ileqquusumik tullianik ataatsimeersuarnissami 22 mio. kr.-inik akiliuteqarnissaq inassutigiumaarlugu.

Aningaasat Nuup avataani sinerissami iluarsaassinissanut atorneqassasut siunnersuutigineqarpoq. Tassunga atatillugu Naalakkersuisut malugeqqussavaat aningaasat attartortuniit tiguneqartut pineqanngimmata, kisiannili ilaatigut Namminersorlutik Oqartussat sinnerlugit ingerlatseqatigiiffiup ingerlaavartumik ingerlatsinermi suliaanut atatillugu aningaasat katersorneqarsimallutik.

INI A/S pisussaavoq attartortut inissiaannik ingerlaavartumik aserfallatsaaliuissalluni. Naalakkersuisut siunnersuutigaat INI A/S-imiit iluanaarutit sinerissami iluarsaassilluni sulianut atorneqassasut, tassa iluarsaassinissamut pisariaqartitsisoqarmat aamma sinerissami sanaartornikkut ingerlatsinerup annertusineranut iluaqutaasinnaammat.

Allannguutissatut siunnersuummut nr. 157-imut isummernissani Aningaasaqarnermut Ataatsimiititaliap kinguartissimavaa, tassani Naalakkersuisut siunnersuutigalugu konto pingaarneq 87.00.88 Nunaqarfinni isorliunerusunilu sanaartornermi iliuisissaniit 11 mio. kr.-it tiguneqassasut Nanortalimmilu atuartut angerlarsimaffiannik pilersitsinermut atorneqarlutik. Taamaaliortoqarpoq kontomi pingaarnermi 2012-imi 9 mio. kr.-it taamaallaat sinneruttussaammata. Aningaasaqarnermut Ataatsimiititaliap kaammattuutigaa aningaasat allaninngaanniit nassaarineqassasut.

Naalakkersuisut tassunga atatillugu oqaatigissavaat aningaasaliissutit Nanortalimmi atuartut angerlarsimaffiannut ilassutitut aningaasaliinissamut qinnuteqaatip kingunerimmagit, taanna 2011-mi ukiakkut Aningaasaqarnermut Ataatsimiititaliamut saqqummiunneqarpoq. Ilassutissatut aningaasaliinissamut qinnuteqaammit tassannga takuneqarsinnaavoq kontomit pingaarnermit 87.00.88-mit 11 mio. kr.-it Nanortalimmi atuartut angerlarsimaffiannut tiguneqassasut, tamannalu Aningaasaqarnermut Ataatsimiititaliap oqaaaseqaateqarnani akuerisimagaa. Allannguutissatut siunnersuut taanna aalajangiusimaneqassasoq Naalakkersuisut taamaattumik kissaatigaat. Naalakkersuisut taamaallutik neriutigaat Aningaasaqarnermut Ataatsimiititaliap pingajussaaneerinninnissamut isummani allanngortissangaa, tassa allannguutissatut siunnersuut Inatsisartut Aningaasaqarnermut Ataatsimiititaliaanit siusinnerusukkut aalajangiinerata kinguneriinnarmagu.

Konto pingaarnermi 87.00.88-imi tassani Aningaasaqarnermut Ataatsimiititaliaq namminerisaminik allannguutissatut siunnersuuteqarpoq, aningaasaliissutit nunaqarfinnut inuttamikkut amerliartortunut aamma nunaqarfinnut inuttamikkut ikiliartortunut siunnerfeqartumik aningaasaliissutaallutik. Tamanna Naalakkersuisunit tusaatissatut tiguneqarpoq.

Tamatuma nanginneratut eqqaaneqassaaq 2011-imi ilassutitut aningaasaliissutissanik

qinnuteqaatissamik Naalakkersuisut suliaqalersaalemata, sinerissami atuartut angerlarsimaffiit aamma ilinniartut ineqarfiit immikkut aningaasaliissutissanik immikkoortortitsisoqarnissaa qinnutigissallugu. 2011-p ingerlanerani uuliasiornermiit immikkut akileraarutigut isertitaqartoqarnissaanut atatillugu tamanna isigineqassaaq. 2011-mi oktoberip qaammataa pillugu missingersuutiniq malittarinninnermut atatillugu suliniut taanna Naalakkersuisunit ilimasaarutigineqarepoq, taannalu Aningaasaqarnermut Ataatsimiititaliamut Inatsisartunullu apuunneqarsimavoq. Suliniut taanna 2012-ip aallartinnerani immikkoortumut pilersaarummik ilaneqarumaarpoq.

Tassunga tunngatillugu Naalakkersuisut allannguutissatut siunnersuutaat malugeqquneqarpoq - taanna Aningaasaqarnermut Ataatsimiititaliamit akuerisassanngorlugu inassutigineqarpoq – Nuup avataani sinerissami iluarsaassinernut aningaasaliissutit ataatsimut 2012-imi 37 mio. kr.-inik qaffanniarneqarlutik, aamma ukiuni 2013-imi aamma 2014-imi ukiut tamaasa 15 mio. kr.-inik, taakkunanga 2012-imi 22 mio. kr.-it INI A/S-imi iluanaarutineerlutik 15 mio. kr.-illu Nuummi Tuapannguani napasuliarsuit 2012-imi, 2013-imi aamma 2014-imi tunineqarnerinit isertitaneerlutik.

Aningaasaqarnermut Ataatsimiititaliap maluginiarpa, KNR-ip illutaa atortuulu pitsaavallaanngitsut, tamatumalu kingunerisaanik ukiuni aggersuni aningaasaliissuteqartariaqarneq annertusisinnaalluni. Ajornartorsuit Naalakkersuisut arajutsimanngilaat, aalajangernissarli sioqqullugu, tusagassiornermik sammisaqartut illuannik pilersitsinissamut periarfissanik misissuisoq suleqatigiissitaq utaqqimaaqqaarusullugu.

Taakku saniatigut 34.15.01 Paarisamut aamma Inuunerittamut kiisalu innarluutilinnut najugaqarfinnut tunngatillugu aningaasaliissutit pillugit nassuiaammik Aningaasaqarnermut Ataatsimiititaliaq ujartuivoq. 2012-imut AIS-ip aappassaaneernejarnerata pingajussaaneernejarneratalu akornanni taakku allakkatigut akissuteqarfigineqarumaarput.

Pingajussaarinissamut allannguutissatut siunnersuutit naatsorsuutigisat

Kummune Kujallermut immikkut ittumik taarsigassarsitsinerup peqatigisaanik Qaqortumi meeqqat atuarfiata iluarsaaneqarnerata naammassineqarnissaanut 38 mio. kr.-it matussutissaannik kommuni qinnuteqarpoq. Tassani pineqarpoq pilersaarutip akisunerulernera, kommunip sanaartormik oqartussaaffik tigusimammagu. Akisunerulerneranut pissutaavoq annertuumik oqussimanerup aamma PCB-p qulaajaaffigineqarneri. Naalakkersuisut siunnersuutiginiarpaat konto pingarneq 84.40.10, Kommunini atuarfiit pillugit pilersaarutini missingersuutitut sunniuteqanngitsumik allanngortiteriffigineqassasut, taamaalilluni Qaqortumi meeqqat atuarfiata naammassineqarnissaanut inissaqalersillugu.

Tassunga atatillugu Narsami atuarfik pillugu pilersaarut Naalakkersuisunit nalilersoqqinneqarpoq. Narsami meeqqat amerlassutsimikkut ikiliartuinnartut illoqarfimmi atuaqatigiiaanut marlunnut atuarfeqarnissaq pisariaqarunnaarsippaat, akerlianilli meeqqat atuarfiat atuaqatigiiaat ataasiinnaasut ininik atuarfiusussanik sillimmatissanik peqartillugu.

2012-imut AIS-p pingajussaaneerneqarnissaanut aningaasanut inatsimmi oqimaaqatigiissitsineq qulakkeerniarlugu Naalakkersuisut siunnersuuteqalersaarput.

Tassaniipput ilaatigut eqquiniaanermi akitsuutip qaffanneqarnera aamma poortuutitut akitsuutip qaffanneqarnissaanut siunnersuut. Siunnersuutit taakku naatsorsuutigineqarpoq ukiumut 18 mio. kr.-inik annertunerusumik isertitaqarnerutitsissasut.

Pingajussaaneerinninermut allannguutissatut siunnersuutit akuerineqassappata aningaasanut inatsimmi 2012-imi IS-imi oqimaaqatigiittoqassaaq. Ukiunili missingersuusiorfiusuni amigartooruteqassaaq, taamaalillunilu 2013-imut aningaasanut inatsisissamik suliaqarneq siunissami qanittumi oqimaaqatigiissitsinissamut aamma siunissami ungasinnerusumi aningaasaqarnikkut attanneqarsinnaasumik ingerlatsinissamut tunngavissaqarnissamut Naalakkersuisunut Inatsisartunullu ilungersunartuussalluni. Nutarterisoqanngippat attanneqarsinnaasumik aningaasaqarnikkut ingerlatsilersinnaanngilagut, taamaattumillu Akileraartarnermut Atugarissaarnermullu Ataatsimiititaliarsuup isumaliutissiissutaanik iluaqutaasumik malitseqartitsineq ukiuni aggersuni suliaassatsinni annersaassalluni.

Naggasiineq

Naggasiullugu ukiup tullianut aningaasanut inatsisissamut siunnersuut pillugu naalakkersuinikkut isumaqatigiinniarnernut atatillugu ajunngitsumik iluaqutaasumillu sulinermut partiit tamaasa qujaffiginiarpakka.

Taamatut oqaaseqarlunga inimi maani aningaasanut inatsit pillugu ajunngitsumik iluaqutaasumillu oqallinnissamut qilanaarpunga.